



TXINDOR

Iturria: *Txindor*, Emeterio Arrese. Leizaola, 1928.

Klasikoen Gordailuan:

<http://klasikoak.armiarma.com/idazlanak/A/ArreseETxindor.htm>

Emeterio Arrese

Klasikoen Gordailuak egindako lanak oro dominio publikokoak dira, eta, Jabego Intelektualaren Legearen arabera jatorrizko idazlanak bestelako eskubiderik ez baleuka, nahi bezala erreproduzi daitezke.

Irakurle:

«Nere bidean» aspertu ezik ostera len bezin ameskor eta zaletsu ibilli naizen aldiko gora-berak idazti batean ezarri ta beronekin gaur zugana abegi on eske nator.

Emen darakustan olerki-sorta belaxka izan arren, nere gogozki-ko arduraz urri ez dago beintzat. Ez ere txindor gaxoa ixill-ixillik, otzika-raz eta sorayo beti; lei bero maitetsu batek papartxoa noizik-bein igi erazten dio.

Neurtitz oek, beraz, onespen-gai izan al'balitezke, nere arazoen saritzat lortu nezaken ordañik aberatsena orixe litzake: euskalzalearen biotzari deika alper-alperrik ibilli ez naizela jakitea. Idazti onen bidez ortaraño iritxiko baldin banitz, zorionean Txindor...!

EGILLEAK

Donosti, 1928'ko Garagarrillaren 1'an.



TOLOSA

Abesgai

*Amagoi baten antzera
oparo beti
Tolosaren urbillean
Uzturre-mendi.*

Onen bularrez osatu balitz
bezela dagon erriya
ikusi orain t'agurtu bere
aurrerapen ugariya.
Entzun, entzun or ibai aldeko
lan-eresi pozgarriya
burrunba luze, txirriots eta
tinki-tank-ari biziya.

Goizean oso goiz eguzkia
agertzen asi baño len
lankai-otsezko eresi ori
egunero da berrizten.
Emengo mendi-kolkoretatik
gugana bizkor datozen
iturritxoak «tokil» dasate,
«Tolosa'ri muñ lenbailen!»

Jardun politaz «omen!», diote,
ibai-ertzeko txoriak,
«omen!» ur-jauzi durunkor eta
lantegi-txistu zoliak;
«omen!» zut-zutik egoki dauden
suburu lirain guziak,
«omen, omen!» an gora doazen
ke-mordo garailariak.

Ezin ukatu sasoi bateko
olagizonen kemena

ondorengoei Tolosan beintzat
sendoki txertu zaiela.
Nausi-mutillak elkarganako
bayespenik ederrena
erakutsiaz argizten due
erri xar onen izena.

Agur-ba zuri, agur Tolosa,
lantegi eder joriya,
urritxo bañan gogoz dagizut
nere agur-abestiya;
mingañak esan al balezake
biotzak dion guziya
ez litzake ain txepetx izango
olerki onen txoriya.



ARALAR

Aralar, Aralar, otoi-mendi...!
Kementsu ta betigarai
gizandi jator baten antzera
goi-goyen zakust aberzai.

Oztin-aldean zure tontorra
bizio gallen dagerzu,
aldiz-aldizko lañu-mordoa
beste lokirik ez dezu.

*Intzitxa*o'ko basoari muñ
ematen diot urtero;
bai bear ere gure lengoen
illobizai dan ezkero.

Aitor'en oyu zoli bat bezin
biotz esnale zu beti
ernai ta sendo goreneng zaude...
Otoi-mendi, otoi-mendi...

MENDI-MENDIYAN

Artzai baten abestia

*Bizitz-negurri zeatzak
urren pozkai aberatsak.*

Mendizale naiz, gero ta geigo!;
beraz nere biotzari
ezertxok eman ez lezaiok
mendiak ainbat goraldi.
Egizko poza mendiyan dago,
mendiyan atseden-ezti
gain-gañekoien iturburua...
zoriona goyan beti.

Oraindik ez nau menpean atzi ezin bat iritxi nayak,
iñoz ez bere listorrez josi aundikerizko etsayak;
oniritzi-ta gogoz arturik Izadiaren emayak
naiko atsegina bertan du noski zintzo bizi dan artzayak.

Ardizai emen bakar bizi naiz nere txabola xarrean,
bakarti, bañan zoruntsu goiko saroi eder ixillean;
pozaren bidez irrinlz-oyuka nabillen aldi berean
mendi-kolkoak erantzuten dit ots alai bete-betean.

Goizean-goiz nik begiratzen det urrutiko sortaldera,
t'illun aurrean ziaro dakust eguzkiyaren sarrera;
begi ta gogo zabal-zabalik lilluratu bat bezela
egon ondoren jolas-oyuka zaletsu nabil ostera.

Artalde gizen oso bikaña; esne ta gazta ixit naro;
aldi soill, gori, zekenik emen ez det izan egundaño.
Egarri banaiz, iturritxoa poil-poilketa beti maitaro;
otorduetan, mami guriya; gabean lasai, lo-ta lo...

Ta lo gozo au izan oi arren iraute luzea duna,
ustez begiyak itxi orduko sortzen da berriz eguna.
Gentzaro maite zoragarri, atsedenaldi biguna...!
lengoz gañera loak darakar artzayaren osasuna!

Goiznabarrean era xamurrez otoi eztitsu, garbia,
egin ondoren idikitzen det Bordagarai'ko esia;
larrean pozez yausika dabil artalde txuri-txuria,
ta nere barren, bildotx antzera, biotz esnatu-berria.

Irrintz eginaz goretsirik ain izate garbi, zintzoa,
bizimaill ontan osatu zaizkit soin-indar eta gogoa.
Menditar txiro bat naizela ta basati kaiku loloa?...
Uyui! gizarro, igana zia k nere pozaren zantzoa!

Orraingo zenbait sasi-jakintsu, gaitz guzien antzera,
itxu daude-ta sarri litezke amildu negar-lezera.
Pozez ain jori dalako berriz artzayaren izakera
nik emen ainbat atsegina ez du an bean iñork, bai zera!

Erpin gañetik, ezpada beintzat egoaldi oso illuna,
arrano batek lezaken eraz ikusten oi det urruna:
itxaso zabal, ibargi naro, baserri jator txukuna...
Ikuskin eder oen gain baña nere txabol zar kutuna!

Urrin gozoa banatzten daude lardi, baso ta zelayak;
ipar ariñez maita nau emen arratsaldeko garayak.
Loreak bere likura damait, itzala pago zardayak,
ta iñori baño lenago muxu eguzki goiztar alayak.

Goiratu nadin kolko ta zangar sendoak dauzkat aldakai,
laister-bidetik igo-ta goren irrintzika nabil noiznai.
Illobi zarrez betea dagon mendi-mendiyan arditzai
Yainko'ri esker ondo bizi naiz, nere biotzak beti ja!

AYA-MENDI

Aitzen artean aitzik zarrena,
erpin sendo gurgarriya,
urpetik emen aurren-aurrena
agertutako mendiya
zugana bizkor eldu geranok
bai atsein zoragarriya...!
Emendik orain lau aldetara
zabaldurik urrutiya,
egoaldi onez argi dago-ta
ikusten gaude guziya
itxaso, mendi, zelai, basoak,
tarteka berriz erriya,
atzeko mugan leo txuri bat,
aurrez-aurre, Donostiya.

Mendi aiton: zure gañean
igaro degun aldiya
osatu dedin bertan daukazu
ugayotz garbi-garbiya,
lenen-garaiko basauntz ariñen
edan-toki bereziya.
... Ubegi aratz ozkil onegaz
ase nai det egarriya!



UZTURRE

Euskal-erriyan beste mendigoi nagusi
asko izan arren betiko gure zaindari,
mendirik aundieta bezin ikusgarri
pin-pin, zut, alai dager tontor bikotx ori.

Negu beltzean ere biziro egoki,
naiz tximixtaz argitu, naiz elurrez jantzi,
buru ta soin Uzturre jator dago beti.
Arkaitz biyurtutako zantzo bat dirudi!

ULIA

Donostiya ta
bere inguruko
zelai, baratz, lilitegi,
salleder naro
guzien gañez
maita det Ulia-mendi.

Eguzkiaren
dizdiz alayak
sarritan muxu damaio,
eta muiñ aratz
onegaz indar
bero bat osatu zaio.

Udaztearen
arnas epela
legunki zetorren garaiz
goi-aldi eder
luzean antxe
amaika bider egon naiz!

Ta zenbat aldiz
arkitu ere
bakarrik, ixill osuan,
piñu lerdenez
jantziya dagon
aldameneko basuan!

Lertxundi polit,
xakon, biguna,
udaran izumai-toki;
basterrik maiten
gelgarriena
lertxundi orixe noski.



Ardi batzuek
abaroan lo,
ni berriz oroitz-ausnarka,
zoritzar baten
egazti beltzik
iñóiz etzegon eraka.

Biotzari an
lili-usayak
ats egin erazten dio,
ta nigan ere
pozaren-poza
loreantz urrin-jario.

Mendi maitea,
atseden billa
dijoazenengalena,
bai gozoa zuk
laztan ixillez
damaiezun erantzuna!

ILLUNABARREKO ZORIA

Urgul-mendi gañean

Itxaso-mugan,
suturik ango
oztalde nabar guziya,
geldi-geldiro
jeisten ari da
eguzki-talo gorriya.

Erabat emen
ixilldu dira
kantari zeuden txoriak,
sorginkerizko
lillura dakar
arratsaldeko zoriak.

Keriz otxana
maitale dator
illun-aurreko aroaz;
t'astiro xamar
kayo batzuek
Uli-mendira dijoaz.

Itzalak orain
bigun, emeki,
loa dakarren garayan,
izar txuri bat
ale bikaña!
piztu da goiko sapayan.

Donostiya-re
txingi aratzez
begira zeñen polikil:
lorategiko
ipurtargien
antzera or... zenbat argil



Bertan jayoa
dirudit; emen
egongo nitzake beti;
azkar igo naiz,
jeisteko bañan
gogorik ez, iraso ni..

Otoi ondoren
agur dagizut,
agur, gabaren itzala;
zure bitartez
loak atseden
gozo bat eman deiala!

ITXASOA

I

Eguzkiz bete balitzao-re
une gezala,
garden jori ta sotillago ez
itzas zabala;
badirudi gaur maitaro bere
barrengo itzala
goi-oztinéko leñuru batez
argitu dala.

Alatz urdiñal Zer eztai emen...
zer, nungo zori...?
Itxaso berdin onek irripar
gozoa dagi;
ta noiznai bere apar-xareaz,
eule maitari,
laztan txuri bat ematen dio
Donostiyari.

Arrantzalien lagun gaur, eta
biyar illobi,
nork esan orren aldakor danik
urdin-soill ori?;
marmario ta jolas ariñez
orain emeki
urbildu arren agiyan etsai
liteke sarri.

II

Orduan goibel... izugarrizko
indarrez azun,
tximist, aize ta kemen guziyak
arturik lagun,
odoi-mordoen errai beltzetik
an dator illun,
an dator gainka orro ta txistu,
durun ta durun!



Arkaitza jo-ta lertzen danean,
ostera bere
seta makurrez gero ta geigo
atzetik beste
ur-mendi-salak tontorka datoz
lerkoi, asarre,
lur'tar guzien gañez erabat
irauli zale.

* * *

Intziri sakon egille beti,
naiz osiñ-arro, naiz ugin-bare,
zerbaiten biotz eskutuko zu
idaroki-gaiz betea zaude!

ARRAUNKETA

Egun alaya...
Jai eder baten
aztarnak biziro agitz
euskal-abenda
goratu zale
itxas-uri ontan dabiltz.

Arraunketa da...
Mutill bikañak,
zarrena beren lemazai
arturik, orain
bertan asteko
tankeraz daude txit ernai.

... Treñeru biyak
rrau! irten dira,
irten oldar bat-batean;
txanpaz jo ta jo,
pitsa darie
arraunkada bakoitzean.

Egatu nayaz
bezela, branka
noizik-bein arin jasoaz,
ur-gaña zorrotz
erdibiturik
leitsu ta bizkor dijoaz.

Orain urrutia...
Baretu dira
pittin bat gure dardarak;
laister ordea
berriro lengo
poz eta biotz-ikarak.



Onuntz bira-ta
zuzen, ederki,
leyaz gero t'areago,
egiñalean
kementsu datozi
zein baño zein azkarrago.

Itxas-ontziak
orro ta txistu;
aupaka biotzen lera.
Treñeruk berdin
igaro due
gaztelupe-ko sarrera.

Ekin mutillak!,
ori dek, ori...!,
jo griñaz ikur-aldera!
Bertan zerate,
arraunkada bi...
abeon degizuela!!

Egun alaya...
Jai eder baten
aztarnak biziro agitz
eusko-abenda
goratuzale
Donosti zarrean dabiltz.

KAYUAK

Ego luze lirañez
aizea bigunki joaz,
goizeroko jarraitzez
orain egun argitzez
Zurriola'ra dijoaz.

... Berebiziko sarda
osaturik txuri-txuri
jai eder batez udan
aparretik sortu dan
egazti-salla dirudi.

Pozak darabitz orren
aldartetsu ta zaleki,
girringa ta txioka,
jolas-irabioka,
ondoren berriz... plaxt, jetxi.

Noizik-bein aide xamar
ugina lertzen dan batez
apar arroaz beren
lumak busti ez ditezen
bai arin goitu, bai errez!

Ur-gañean batzuek
ostera gelditu arren,
noiznai lengo aldiya:
berriro sail guziya
zalapart osuan laister...

Goiz argiak damaien
aldartez kayuak zorun,
zear, gora ta bera,
gogo duten aldera,
jarraika dabiltz edonun.



Nun sortu ta zer izan
autetsi al'banezake,
oiek bezela kayo
Gaztelupean jayo
eta biziго nitzake.

INDARRA NAGUSI

Danbateko latz ikaragarriz,
ixtillu larriz,
bete dira gaur itxas ta lurra;
gudots makurra,
laiotz astuna,
zorigaitzoaz aspaldi ontan
ekaitz-egotan
iparraldetik datorkiguna.

Biotz guziak naigo batean,
pake-pakean,
indartu bear liraken garaiz
zertan ari aiz,
zer i, goitarra,
grinaz beterik jaso ta estutzen,
dar-darka igitzen
odol darion ukabiltzarra?

Lurtarra buruz ez da motela;
txorik bezela
egaka dabil arazo gabe,
bañan ala-re
ez derizkiok, ezin det aitor
biotzez iñor
bear dan ainbat goratzen danik;
lurtar izanik,
naiz uso baten eraz ibilli,
naiz egan ari,
bere setillun t'azpikeriaz
uso ez bañan sator dirudi.

1914'n urtean



UDABERRI

Eguraldi txar otzaren urren
eldu da beste giroa,
udaberriyak orain dakarren
ernaro xamur gozoa.

Oso goizetik eguzkiyaren
irriparr legun, aratzak,
maitatzen ditu etxe-aurreko
lilitegi ta baratzak.

Telatupean txioka daude
enada polit argiak;
mendi-mendiyan biñatu dira
txoriño jator guziak.

Baso ixilletik sortzen da garaiz
kuku-abesti leguna,
gaur bezela nik umetan gogoz
ainbeste bider entzuna.

Or goi-aldeko malloan *kir-kir*,
emen txirripa ta txio,
nunaitik orain sortzen dan jayak
pozaren-poza dario.

Losor illunak arindu dira,
ernemin guziak piztu,
lur eta gure biotz-indarrak
era berdiñaz osatu.

Negu beltzaren elur-izara
udaberriyan iturri;
larre, soro ta basoak alai,
an goyen berriz oztargi.

... Lili bikañez apaindu zeran
udaste naro, maitea
zartu naiz, baña zugan arki det
gogo-muin berri ezea!



LORE-JAI

Nere gelako
leyo xarrean
argi-jai dute liliak,
eta jai ori
osatu-zale,
margo bikañez jantziak,
irabioka
or dabiltz beste
lilitxu bizi-biziak.

Mitxelet alai
ta lore polit
oien bitartez gaur neri
zorionean
bar-barren piztu
zaizkit poz-amets ugari,
ta nere biotz
egakor onek
pinpilinpauxa dirudi.

Erle bat orain
biziro txukun
lili-gañean jarririk...
eztigai ona
miztutzen dago
aren kolko xamurretik.
Iñork al daki
maita badira
beren gaiz ixill-ixillik?...

Pinpilinpauxak
udaberriko
lilien aizpa sorgiñak;
poz-pozik orla
ipiñi naute
beren jolasket ariñak:

nere barreng
baratzan ere
txipelet alai oztíñak!

Ene maitiñe
zoragarriak
biotz-biotzez ain bero
jai ontan zuen
etorrera nik
abestu detan ezker...
nere gelako
leyo xarrera
eldu zaitezte goizero!



PINPILINPAUXA

Ego me pollit leun-leunaz
apaindutako mari-sorgiñ,
lore tartean loretxo bizi
 baten antzera
 gora ta bera
 zoro dabil,
zoro ta txukun; pinpilinpauxa
ortarako da jayo berdin.

Margo darion egalari,
poz-estate ta zoragarri.

Egoak ttentte, plixt, ipiñi-ta
lili gañean pinpirinpin
gelditu arren, andikan beste
 lili batera
 laister ostera,
 laister arin,
ega politez jarraituko da
Loramendi'ko mari-sorgin.

Pinpilinpauxa pinpin-argi,
aldakor eta jostalari.

Norbaitek zakar ikutzen badu,
egoetako uztargiriñ
geyena kentzen zaio-ta gaxol...
 xalapart-egan
 nai luke bañan
 ai! len bezin
errez ta zoro pinpilinpauxa
iñolaz ere jardun ezin!

Lilitegien maitagarri
pinpilinpauxa ta udaberri.

MAITIÑE

Gorenengo basoan

Lilien aizpa zeran Maitiñe,
pipill kutuna!: mendigañean
guk ainbait atsegin-ezti
maitatzaleak bakar-bakarrik
izan lezeke... Zorionean
gaur biyok emengo aldi!
Jai oberik zer...? Oyanak bere
itzal oxkarra ematen digu;
liliak usai-opari
xamur, eztitsu, legun-leguna.
Gañera berriz, au da zoruna!
txit bertan orain uso bi
urruka daude, ta urrunga baño
askoz obe ta gelgarrigo dan
zure mintzo eder ori
entzunaz, ene maite gozoa,
nere burua zugan etzanda
amets-egille bat naiz ni...!



AGUR, EUZKADI

Arratsalde da.

Itxasoan arki naiz.

Urruti... doi, doi,

lañotsu dager

Auñamendiko

erpin-lerroa;

ubelantz ene

aberri polit

maitagarriya...,

oroi ederren

kabi gozoa.

Itxasoaren

murmur-otsa-gain

kayo bakar bat

aruntz dijoa;

ta... noralderik ez dun

antxeta bezin larri

biotzaren kai billa

artega dabil

nere gogoa.

Eguzkiaren

biribill solla

ziaro gorri...

Odeiak sutu dira;

itzalune bat

une guziya

izain da sarri.

... Ega leikorraz nere

dardar-txorria

sorterminaren

kolkora doa

anitz urduri,

eta itxas-ontzi au

ke-mordoll usu

beltza botaka

bizirotz zorrotz

aurrera beti.

... Arratsa dator;

odei-naspillak

lozorro baten

eraz dagertzi.

Goibel au etsai-ozin...

Ipasterreko

mendatz bat ere

nai arren ezin...

ezin ikusi!

* * *

Begietan nik orain

gau illunaren

illun sakona;

oroitzez baña

gogoan argi!

Agur txoko maitea,

ene laztana...,

biotz-biotzez agur,

agur, Euzkadi!



AMETS URDIÑA

Euskal-erritik urrutti nago,
bañan gogoz ni beti an...
an nabil pozik egunez eta
gaberoko lotaldian.
Argitasuna zetorren garaiz
egun-txintakin batian
o, zeñen amets zoragarriya
egin detan gaur goizian!
Itzez nork esan, nork amets ori
piztu lerro soill tartian?
Ez..., ez; oparo, sortu dan eraz,
bego nere biotzian!
Amets maitea, amets urdiña,
ostera gaurko zorian
atoz... atozkit betiko loaz
nere begiyak ixtian!

NEGAR TANTOAK

Kuba'ko ugarteak ixuriak

I

Urruti dago gaztea nitzan
sasoi artako denbora;
oroimen zarrak, zertan zatozte
gau t'egun nere gogora?,
argi-zale dan altxora?

II

Len irudimen-txingar zoliaz
pizten zitzaidan burua;
orain... txingarrak ez baña bertan
irudi auts biyurtua,
errekai baten geldua.

III

Oraindio ni zergatik nagon
ain bakar mutill zarturik?:
elur gañean txoriyak iñoi
ez du egiten kabirik,
orlegi batean baizik.

IV

Erle txuri ta leyari batek
ikutu zidan barrena;
ez nekin zer zan ikutze leun
ark ondoren zekarrena:
listor beltzaren eztena!

V

Aldegin bear ez nun garayan
utzirik babes-tokia
zorigaitzoan urrundu nitzan...
Emengo nere aldia
samin, latz, izugarria...

**VI**

Ama gaxoa nere galdezka,
ni berriz emen... urrutil;
aren begiyak itxi dira-ta
nereak malkoz eztali;...
negar darie lerzori!

VII

Argiro neuzkan poz-bide guzik
bat-batez illundu dira;
itxuen eraz argatik nabil
beti zerurontz begira...
amatxo dagon tokira!

AMA, NUN ZAUDE?

Emendik urrun..., Ameriketan,
nebillen garaiz ez nuan uste
etorkizunak zekartzidanik
zoritzarrez gaur ainbat atsege.
Goiz argi batez jayotetxera
eldu naiz, bañan... ama, nun zaude?
Erantzunik ez!..., erantzun ordez
pozkai guziak ixillun daude!
Arrezkero ni burutik nastu
banitz bezela, kezkaren mende,
il zan amatxo maitea nun dan
galdezka nabil aterik-ate;
t'adur beltzaren zaunka larriak
atalondotik uxatze'naute.

Etxe-inguruko lizarren osto
bakanak orain udazkenean
aizeak jo-ta txipelet illen
antzera zurbill darortzenean...
txantxangorri bat ni bezin estu
adar billuzi baten gañean
txioka dago... negarrez bere
kabi sollaran aldamenean.
Txori gaxoa: etzaite ixildu,
biyok erabat jardun gaitean;
zu bezelaxe larri nago-ta
nere barrengo negu beltzean
zorigaitzaren txantxangorriyak
negar dario arantz artean!



OTOITZARO

Gau artan egindako negar-otoitzat

Txintik iñun ez... Gaberdiyaren
altzo ixillean lurtarren griñak
orain lo daude...
Izar politak zeruko pitxi
maitagarrien antzera dir-dir
egiten due.

Nere gogoak ernemin bero
igikor batez ortze garbira
begirazten dit...
Negar-malkoen urrin daron
otoi eder bat, otoi xamurra!
biotzez dagit.

Ixil adikor zoragarriya...,
nere amaren laztan-irudi
gozo-gozoal:
zure bidez nik bizitz au baño
geigo maita det gero zer izan
eskutukoa!

MENDI-ZALE

Usamendiko arizti zarra:
Kezkaren osin beltzetik
urundu nayaz ixil ontara
eldu naiz gaxo..., bakarrik!
Amagabeko bizitz illuna
luzaro jasan ezinik
beste Amaren billa negarrez
aldegin det an beetik.
Negarrez nator zure kolkora,
negarrez jayotz-erritik,
iñoz entzuten ez dalako an
jardun arrotza besterik.
Mendi maitea: ez naiz beñere
irtengo zure basotik!



IZARTXUNE'RI

Bere urtegunean

Aitormendiko aingerux batek
ikusirik bart pozez ni
alako garaiz egiñalean
lore billa mendiz-mendi,
xorta polit au ekarri zidan
onela esanaz: «tori,
nere aizparen eskutan bigar
egun-argitzez ipini.
Zorion-agur, zorion-agur,
jai ontan Izartxune'ri,
emengo lorez bere biotza
eztiro gozatu bedi!»
Ondoren berriz ego zabalik
illargitan txuri-txuri,
Iparmendiko baso gañetik
aldendu zan Maitagarri.

* * *

Xorta bikain au artu ba gogoz,
kolkotxo gañean jarri,
ta lore oiek usai gozoa
darien eraz..., legunki,
zuk ere biotz barrenen dezun
atsegínezkiko lili
xamurrez poza jario zazu
gaur bezin oparo...! beti!
Zorion-agur, zorion-agur
jai ontan Izartxune'ri!

NERE BASETXEAN

Amesgillien pozkai ederraz
alaitu naiz bat-batean
ego-aldetik enada bi gaur
etorri zaizkidanean.
Goizetik emen era gozatsu
xamurrez, ixill antzean,
abegi on bat eskatzen daude
txioka tellatupean.

Txori maiteak: luzaro jardun,
ez ixildu, gogoz aril;
zuen txiogaz amets eginda
esnatu naiz olerkari.
Egazale dan biotz arin au
pizturi oso ta garbi,
goiz eder ontan egun argitzez
biurtu zait oztin-txori.

Udaberriro zintzo datozi
yoan arren udazkenean,
lagun oberik arkitu ezin
nere aterpe xarrean;
enada polit oiekin batez
Saratxomendi gañean
burauste zakar illunik gabe
bizi naiz pake-pakean.

Mendiyan iñoi aldarte txarrrik
ez det izan..., lasai nago;
aldi bat ezik bizitz osoa
nai nuke bertan irago.
Txindiz aberats ez banaiz ere
pozez nor aberatsago?;
atsegíñaren ezti jatorra
an beau ez, emen dago.



Elkarren etsai bizi dire-ta
gauz onik ez uritarrak;
mendiyan beso zabalik daude
aritz pago ta lizarrak;
iturritxoak biziro garden,
eztitsu lili nabarrak,
eta goizero txioka nere
telatupeko maiztarrak.

* * *

Txori maiteak: berriro jardun,
ez ixildu, leyaz aril;
zuen bitartez amets eginda
esnatu naiz olerkari!

EZTILLARGI

Lagun zintzo bati, ezkondu zan egunean

Gutxi nezake; nere muñetan
ez dago txingar-alerek
itz motel oien illuntasuna
zerbait piztu lezakenik;
egatu nayaz indarka emen
asi naiz bañan... alperrik!
satorrai ezin jayo beñere
uso politen egorik.

Alaz ere nik esan nai nuke
al bezin eragoi, txukun,
zure berriion ori dala-ta
zenbat txalo jo ditugun.
Argi darion lore bizi bat
izanik betiko lagun,
beronek o, zer-nolako poza
gaurtandik emango dizun!

Amaika jolas eta par gozo
eragindako billera
len bezin alai ezin arkitu
zu gabe gaurtik aurrera.
Aingeru baten aldamenean
zoruntsu biziko zera,
bañan noizik-bein agertu zaite,
etorri lagun artera!



ZORENTXU

Olerki-gayik ez nuan eta
gai eder bat osatzera
argirudiantz, ene Zorentxu,
egoki etorri zera;
aurrean beingoz ikusirik ain
arrigarri dan sorkera,
ez dakit oztin-gaiñ ori edo
zu zeran zeru ber-bera.

Itzegin ezik, ikusi utsez,
besterik ezertxo gabe,
egin zera zu, maite laztana,
nere biyotzaren jabe;
tximist-argiyaz jo-ta bezela,
begi sorgiñ oien mende,
biotz-barru nik sugar-ikara
gozo bat ala zer ote...?

Orain ez baña gaztea nitzan
garaiz izanik denbora,
etzitzaidan len iñoi orlako
maizterrik sartu kolkora.
Zaudet, zaude or, atea itxi,
geigo, ez irten iñora,
biotz gaxo au zugaz pizturik
jardun bei gora ta gora!

Illargiyaren antzera sotil
nere gogoan zeundena,
irripar batez eman didazu
argi ta zorion dena;
baita nik ere ai-bezin aratz
jasorik irudimena,
lerro-saill ontan gogoz damaizut
ordañik aberatsena.

Galdetu eta maite nazula
erantzun didazu benaz,
zeru ta lurra gaur bezin alai
etzaizkit agertu lenaz;
sargori dagon arrats batean
izuma sortzen dan eraz
nigana ere aizeman arin
gozoa dator mait'egaz.

Ene maitetxo maitagarriya,
oparo maite nazuna,
Aitormendi'ko lili txuriya,
amets-iturri leguna:
zu zera nere bizitz illun au
argiz betetzen dezuna,
asnas-emale zoragarriya,
zu zera nere kutuna!



ARGENTINA-KO EMAKUMEA

Ruben Dario'ren olerki batetik euskeraztua

Arjentin-zelai aberatseko
emakume goretsiya,
esango dizut zer-nola izan dan
zure jatorri garbiya:
esku ona dun lorezai batek
lilien muin bereziya
txertu-lan bidez aldarazi-ta
sortzen da lore berriya,
usai ta margo bikaña duen
orri legunez jantziya;
beronen berdin anitz ederki
jayo ta txukun aziya,
argi-pitxi bat bezin polita,
eztigai zoragarriya,
zu zera likur gozo darion
«pampa»-ko lore biziya!

MAITAGAR

Erderazko olerki batetik euskeraztua

I

Egodun aur ilxuak otsegin du nere atean
eta ots ori dardariztu da elxe ixillean.

Banoa pozik, Maitagar; or naiz, ez itzuri joan.
Atoz barrura; aspaldi ontan zure zai negoan.

Atoz, ikusi etxea. Amets au egin ezkerro
lore bikañez apaintzen ibilli naiz egunero.

Ta bertan orain euki dezazun atseden guziya
luma ta izara garbiaz jantzi det oe txuriya.

Sartu-ba; ongi etorri, arnas-emale maitea;
etxe ontako zorion gaurtandik izan zaitea.

Alaitz audiya nere gogora egun onek dakar,
biotz on baten zorunaz emen izaudet, zaude maiztar!

II

Lau aldiz entzun det, o, Maitagar zorale itxual!,
lau aldiz entzun ikaraz zure azkonen txistua.

Lau bider zauritu nazu: lendabizi kopetian,
gero begitan, aboan berriz urrengo aldian;

ta nere miñaz erruki ezik orain azkenian
zure dardai me, zorrotzak, ikutu nau biotzian.

Adur samiña...! Biotz gaxo au ain gogor josirik
illotz dago ta zorigaitzoz... bizi naiz oraındik!



III

Beti-betiko itxi det giltzaz emengo sarrera,
aur zoro gezidun ori... bijoa nai dun aidera!

Azkon-uztai-ertzakin, kax-kax, jo du nere atea,
ta ots orregaz dardarizten da etxe barrunbea.

AURTXO MAITIAK, ATOZTE!

Eusebio Blasco'ren olerki batetik euskeraztua

Aiton bat naiz ta gogaldi beroz
izanik orain aur-zale,
une politen abots, irri ta
jolasak alaitze naute.
Zorioneko aurtxo maitiak,
nereganan zaitezte!

Umeak lore biziak dira;
oien irritxorik gabe
illun ta bakar etxe sollean
uzkur gaxo bat nitzake.
Zorioneko aurtxo maitiak,
nigana eldu zaitezte!

Biotz mingarri baizik ez diran
oroiimen zar guzik nere
begietara negar-tantoa
iñoi baldin badakarte...,
malko samiñak txukatutzera
aurtxo laztanak, atozte!

Eguna labur, zeregin eta
nekea berriz, bai luze!...
Idiki oso leyatil ori;
eguzkiya doi, doi, ene...!
Maitiño polit argijariok
neregana urbil zaitezte!

Gizonak beti eskergaiztoa
agertu izan didate,
erantzun onik iñoi ez eman
anderux-biotzak ere...
Zorioneko aurtxo maitiak,
egiya zuek zerate!



Aunditu dira nere semeak;
pozik dabiltz; ail ez dute
askoz alai ta zoruntuago
umetan zirenik uste,
nik otsegiten nien garayan:
aurtxo laztanak, atozte!

Eriotsako zori larrian
inguratu nazkizute,
aingerutxoak aldamenean
euki ditzadan ill arte.
Aur zoragarri..., aurtxo maitiak,
muxu bana ekatzute!

JOSE GAMBOA

Biotz-ikaraz nago,
zer esan ez dakit,
irabio samiña
barruan dabilkit.
II zera... gizajoal...,
negar, negar dagit,
begiyak malko beroz
gaur estali zaizkit.
Bañan... arindu bitez;
lur otza bakarrik
ez gerala zerbaitek
adierazten dit.
Orain, Joxe, betiko
zauden goi argitik
zure aztar maitea
emaro betorkit!



IL DA!

Orkaiztegi'tar Patricio jaunaren'ren oroitzañ

Euskoen Ama negarrez dago,
negarez bakar-bakarti,...
malko samiñak sortu zaizkio,
poz-ate guziak itxi.
Zoritxar beltza gaurko zoria;
itun gaude..., kupigarri,
eskutuko'ren aizeman otzak
sugar maite bat itzali...!
Irakasle on ziñana, zure
gotuts argiaren izpi
zoliaz gaurko goibeltasuna
bat-batez urratu bedi!

GOYAN BEGO!

Larunbe'tar Rafael maitea'ren ilberria

Il da Larunbe, biotzez aur bat
zirudin gizon argiya,
illotz... illotzik lurpean dago
maitale maitagarriya.
... Burua makur, begiyak lauso,
orain nik itun-aldiya;
izan ere lagun atsein ori
ain ona zan..., ain audiya!
Beretzat onik ezer gutxi ta
besterentzat on guziya,
orlako batek emen ez baña
zeruan dauka tokiya.
Goyan izatez jaso dezala
irabazi dun sariya!



CARMELO ETXEGARAI

Euskotar zindo jakintsu ori
bere gogozko lanean
buru ta biotz, oso ta bizi,
ain jator ari zanean
ixildu zaigu beti-betiko,
ixildu,... enda xarrean
aren laguntza pozkai litzaken
aldirik bearrenean.

Zeruan jai da..., jai aundia gaur
oztiñ-une zabalean,
eta jai onen goretsigarri
Urtzi'ren aldamenean
zure gogoa zoruntsu bego,
zaude Carmelo, zaude an...
euskoen otoi-urriñez orain
bete dan garbi-sollean!

AMA GAXOA NEGARREZ...

Erraldoi zakar
itxusi batek
aizkoraz jo du aritza,
ta bertan zeuden
txoriak orain
izu ta larri dabilta.

Zastaka beti
gogor daraso
ebaki nayaz lenbailen;
bildur naiz gure
zuaitz ederra
ezpal biyurtu liteken.

Aritz-pe ortan
Amagoi ona
itunki dago..., negarrez,
ain bakar uzten
baldin badegu
ilko da gaxoa miñez.

Arren! utzi ba
zabarkeriak,
eldu laister beregana,
gure laguntzaz
alaitu bedi
Amatxo maite laztana!



SEASKATIK ILLOBIRA

I

Amets igeskor
zoroak dira
lurtarren pozkai guziak,
txingarrak baño
iraute geigo
ez du-ta gure biziak.

Gaztea nitzan
garayan beti
laisterka nebillen, itxu;
orain ondikotz
nere bidean
ñai arren ezin gelditu.

Atseginaren
ibargi-zale
jarraitu nitzan goizean
nere gogoak
poz-irudi bat
ipiñi zidan aurrean.

Ustez eroso,...
bañan ikuskin
arenganako bidea
txangoldari on
ez dirantzentzat
erpe ta zuloz betea.

II

Zertarako da,
zergatik maita
ondore txar dun irritza?
Egizko pozen
iturburuan
edan nai ezik gabiltza.

Biotz geyenak
zalekerizko
igitzez daude lerzori;
etsai gogorra
ñolaz ere
ezin ase makur ori!

Ta geok erru;..
Alperrik dabil
gure gogotzar alena;
gaiztakeritik
erne dan pozak
ondoren beti galena.

Bear genduken
bezela ziñez
gizonak gizon bagiña
ez litzake gaur
izango noski
bizitz au orren samiña.

Elkarren etsai
buru-belarri
gabiltzanok, ain setatsu...
zer ote geran
galdezka nago:
zeken, dolor ala kaiku?



Gauz onik ezin
lortu gerekoi
Izatearen bitartez;
jakiña da zer,...
guziya nai-ta
zorunik iñorentzat ez.

Amets igezkor
zoroak dira
lurtarren pozkai guziak,
txingarrak baño
iraute geigo
ez du-ta gure biziak.

GAU-EDER

Jan-edan utsez bizi nai ez-ta
asmo garbien zale geranak
gau ixillean jarrai-erazten gaitu
pozaren goruntz-egadak.

Arrats gozoa...! Izar bikañez
piztu da orain ortze garbiya...
Eratsu dator..., geldi-geldiro,
illargi bete zoragarriya.

Itxaso bare sotillak emen
aldi berdiñaz, logura xamar,
bere bits arro txuri-ixuriya
ondar gañera poliki dakar.

... Kezka larri bat arindu nayaz
begiratzen det urrun... an gora!;
t'andik izumai atsegíñaren
arnasa dator nere kolkora.

Gaberdiyaren ixill-uneko
lillurapean... orren gentzaro!
lurtarrik ez dan ames-tokira
aldatu banitz bezela nago.

Nere barruan orain ez digart
zorigaitzaren ale bat ere:
azi txarrak on biurtu zaizkit,
samiñak eztí, arantzak lore.

* * *

Jan-edan utsez bizi nai ez-ta
asmo garbien zale geranak
gau ixillean jarrai-erazten
gaitu pozaren goruntz-egadak.



ZORION-AGUR

Elosegi'tar Julianxo'ri bere ezkontz-egunean

Udaberriko pitxi ederrez
apaindu dira lorategiak;
berrionaren otsa dakarte
iturritxoen leyar biziak:
Julianxo ta Mañu'rentzat ain
adierazi zoragarriak.

Emen bertako txoriak eta
toki-aldakor direnak ere
omen-abesti xamurragorik
etzezakien egin beñere.
Enadak aurten jai au dala-ta
igaz baño len etorri dire.

Nere gogozko erle xar onek
pittin-pittinka bart irrazain dun
ezti beroa zapitxo garbi
lakar batean bildurik txukun,
Julianxo'ren eskuetara
maitaro dakart... Ona nun dezun!

Poli ta Miren zure guraso
zintzoeri gaur begietara
zuri bezela txingar urdiñez
irtengo zaie pozaren garra.
Biotz-mamitik opa dizuet
goyeneko dan zori laztana.

Izartxoeren aizpa dirudin
Mañu deritzan panpin argia,
gaurtik aurrera zurekin beti...,
zurekin altxor maitagarria.
Gero ta geigo narotu bedi
zuen barrengo poz-iturria.

Zorionaren goi-goyen zaude...
Iritxi zeran tontor-gain ori
lurretik baño bertago dager,
askoz aldego zerutik noski;
aren onduan arrikoxkor bat
besterik ezin izan Aizkorri.
Zorion-agur, zorion-agur
biotz-biotzez Julianixo'ri!



OPARIA

Tolosa'ri

Jayoterria: Agur dagizut
agur, agur...! Oroitz-indar
pizkorrez orain biotz-barrena
kemendu zait, biurtu gar.
Illunkeriz bein aldegain arren,
izanik beti Tolosar,
jai onen zale gogoak aurten
zugana pozik narakar;
barkatu-ba len ibilli banaiz
emendik urrutti xamar.

Ez nator utsik: erle ixil baten
eraz nik arret audiya
bakar-lanean ipiñi eta
ordaindu det zor guziya;
itz oien bidez ona nun dezun,
erri xar maitagarriya,
amesgillien lorategitik
dakarkizutan eztia.
Oneritzi ba..., gogoz artu ain
opari leun garbiya!

Tolosa, 1923'ko Garagarrillaren 24'n

IBAI-ERTZEAN

Bizitzaren itxasoa
kerizpe ontan ugeldi;
nere atseden zakonak
osin bat ziñez dirudi:
ibaiko auxe bezela
otxan, bare, geldi-geldi,
tokirik eskutunean
irasor antzez nago ni.
Ur, aize ta txoriñoen
mingain jatorraz eresi
legun bat abaro-zear
urbil zait..., urbil maiteki;
baitere susno garbiaz
emengo baxaran, lili,
untto ta senda-belarren
emai gozo xamur ori.
Lur onek axon dario,
ibayak otzen ugari,
ta bero zakarra dagon
garaiz nik, oso zaleki,
amorrayen osiñean
egiten oi det igari.
«Urume» zador, maitea:
zugan da betiko-zori;
bizitzaren itxasoa
kerizpe ontan ugeldi!



AN ZIAK...!

Elosegi'tar Poli'ri

Tolosa egon arren
emendik urrutí,
lagun elkartientzat
orren bide gutxi!
Agur bat egin-zale
nere gogo-txori
egakor au, antziak
iregana, Poli!

Vichy'tik 1927'n

KILITXU SEASKAN

Berdingabeko
aurtxo polita
amaren argi, zoruna,
osatu loaz,
ene potxolo,
eguzki maite kutuna.

Kun-kun, kun-kun...

Egon ixillik
nere biyotxa,
negarrik ez-ba..., ixo, ixo;
amatxok gero
pitxi ederra
emango-ta egin lo-lo.

Kun-kun, kun-kun...

Mumua dator,
ara!..., joan ortik,
utikan! ez eldu geigo!;
altxor maitia
polita da-ta
ez du negarrik egingo.

Kun-kun, kun-kun...

Orain lo dago...
Irrigar batez
piztu zaio arpegiya;
nunbait an goyan
jolasten dabil
Killitxu zoragarriya.

Kun-kun, kun-kun...



Irudi laztan
poz-emaleaz
biyok amets egin zagun:
aurtxoak lotan
eta nik esna...
orren goxo...! Kun-kun, kun-kun...

PA... PA

Alberdi'tar joxe ta bere emazte zindod'ri

Izan dezuen aurtxo
maitiñe laztana
bizitz-argi darion
izar polita da;
zuek zeratelako
bere aita t'ama
biyeri nik zorion!
t'aurtxoari pa... pa...



EGO-AIZEA

Garai batzutan ibilli arren
baztar guziak astindu-zale
egoak iñoiñ ordain baretzu
leuna dakar ots audi gabe.

Euskal-basotan arratsean lo
zegon aldiko ixiltasuna
utzirik orain egun argitzez
jolaska dator aize biguna.

Oztargi dago... Mendi-tontorrak
aldakai sorgin batez bezela
badirudite ten baño urrego
gugandik oso bertan daudela.

Goi eta bea biziro alai
elkartu dira laztan urdiñez,
t'atsemalle dan ego-aizea
maitaro dabil mur-mur aríñez.

Bere bitartez udazkenean
ibarrik-ibar, mendirik-mendi,
banatzten oi da belar garo ta
sagar elduen usai on ori.

Olerkari ta nere antzeko
txoriburuuen aizea dala?
Zorionean, beronen bidez
baldin banaiz gaur txori xamarra!

ETXALAR

Udazkena da... Egurats epel
ariñak usai gozoa dakar;
sortalde-mugan egun txintaren
argi-lorea dirudin izar
zuriya dakust... Garai ederra...

Nere barruan len ez det izan
egunargitze otxanez orain
piztu dan ainbat zorion-dardar.

Ipar-aldera begira nago,...
arindu zaizkit amets-egoak,
t'amets eder au osatzen due
alai agertzen diran usoak.
Ara nun sail bat...! Ega biziyan
gaindurik errez mendilepoak,
bai zuzen t'ariñ onuntz jarraitu
egazti polit urrutikoak!

Bañan... zer etsai sortu da bean?...
Oyu, zalapart, iskanbill naste,...
ardail bizi ta zoroaz dira
emengo baso guziyak betel!;
ta goyan berriz uso gaxoak
izu ta larri, noralde gabe,
Etxalarre'ko sarea jo ta
bertan loturik ikaraz daude...!

* * *

Udazkena da... Egurats epel
ariñak usai gozoa dakar;
eguzki orail irten berriak
Atxurimendi-gañez irripa
alaya dagi,... ta nere biotz
maitekor au ail! usoen era
urduri eta leitsu dijoa
ez daki nora! betiko egan.



TXANTXANGORRIYA

Zuk dezun margo ber-bera duen
osto geyenak lurrean
zuaitzetatik erori eta
banazka, soill, daudenean,
begiyak xabal-xabal jarrita,
adar me baten gañean
egoten zera, txantxangorriya,
negarrez udazkenean.

Ain txukun, apal eta geldiro
jarraitzen zera kantuan,
non ernai beti zuri begira
egon arren bat onduan,
naigabe *prank* banatugatik
kantari zauden orduan,
iñoz ez dizu ari zerala
antzik emango mokuan.

Papar txiki ta gorrixta bor-boil
ler egiteko zorian
jardun-gai oso kupigarriaz
beterik daukazunean,
ainbeste negar..., eresi xamur...,
axanpa guzik batean,
ez dakit nola kabitzen diran
zure kolko politean.

Aldizka, *purruxt*, ega motxean,
uste gutxiñez aurrera
azaldurik an laister-bidetik
maldagora goazela,
gidari zintzo gertu bat izan
nai bazenduke bezela,
gure alboan zabiltza beti
txoríño maiten-maitena.

Maite zaitugun ezkerro nurbait
ordañak aurrez ematen
ote zabiltzan esan liteke
negua sartu baño len.
Ez ikaratu!; elurte gaitzo
audienak izan arren
gure ondoan arkituko da
zuretzako ainbat lurmen.

O, txori gaxo, sotil, polita,
biotz erien laguna,
txiruliuka negar ugari
eztiro dariyozuna:
zu zera beti, txantxangorriya,
zu zera txantxan-iztuna,
alako xe gauz maitagarri bat
erakusten diguzuna!



GOGO-TXINDOR

Ene txoriño maltea,
orren ixillik zer dezu?,
zer naigabe latz, illunak,
ikaraz ipiñi zaitu?
Txindor gaxoa!, ez beintzat
zure kabitik urrundu,
zapelatz gaiztoen poza
ori egingo bazendu.

Zaudet, malte... zaude bertan,
ez izan toki-alidakor,
nere zartzaroan ez det
zu beste lagunik iñor.
Berríro jardun zaite-ba
len bezin alai t'adikor,
yoranez abesten asi,
gogotxindor... gogotxindor...!

ZER NAI NUKIN

Aldeagain

Mendi-mendiyan etxe koxkor bat,
iru-lau aritz aurrean;
lili batzuek; erletegia
toki babes politean.
Atsegín-ezti gozo-gozoa
bord'inguru xakonean
egarriyaren asekai dagon
iturritxo gardenean.
Kezka larriei ateak itxi,
uxatu guzik batean,
maiztar illunik ez izan iñoi
nere biotz barrenean.
Ixil osoa... Iñoren zantzu
gaiztorik ez beñere an,
ametsak lagun, amets egin, bai,
amets ...! mendi-magalean...
Ori nai nuke, ezer ez geigo
bizi naizen bitartean.
Gero... ezurrak arri biyurtu
goreneko tontorrean,
ta ni naizen au gotuts idoro
oztím-une zabalean.

Alderantzi

Zori legunak alde batera
utzirik bear dan bezin
igikor izan, eta jarraitzez
beñere aspertu ezin.
Egiya maite, gezurra txautu,
zuzeneko bidez ekin,



arnari onak sortu ditezen
kezka zindoaz eregin.
Ta zenbait alper baldin ba'daude
beren izaeraz erkin,
lasonar oien gogo muxarra
beti lo egon ez dedin
esnale zorrotz eragikor dan
deadar bizi bat egin.
Ori nai nuke; bar-barrenengo
griña beroaz irakin,
ta nere bizitz-azken garayan
ur-ertz alai batean ill.
Gero... soin otza itxasoaren
ozinak eraman urrin,...
gezal biyurtu, ta *ni* yoranez
ezilkor naizela jakin.

GAUR IRE EGUNA

Kortejarena'tar Eugenio'ri

Jai au gorendu-zale nauk, eta
itzez nai bezin ederki
jardun ez arren, zer gero...?, gaur nik
kezkaren zimiko gutxi;
iztun sor edo txar izateak
naiz poto egin-erazi,
nere gogoa etzeok beintzat
mingaña bezin elbarri.
Agur, Eujenio; i bezelako
gizon jator, maitagarri,
banako batzuk izan litezkek,
oberik iñor ez noski;
buruz ernaya, biotzez ume,
eztarri leunaz txori,
aldegai guzik irekin dituk...,
irekin oso ta garbi.
Berriro agur, agur, Eujenio,
eun urte bizi aril!



ÑIR-ÑIR

Gaur urtezar da... Neretzat egun
ziaro goibel, itzala;
susperraldi bat nigan ez, baizik
oroitz-ernemin-ikara.

Ain gogo-motel nagon ezkero,
berez ezin baldin'bada,
ardo beltx onez indartu bedi
nere barrengo taupada.

Malen, ixuri!;
leyar xakona
poliki bete;
ixurtzearen
gurgul-ots ori
edan-pozaurre!

Buru ez baño sapayo zar au
arestian sormindua,
orain ez dago beintzat illunde
nagiz korapillotua;
alik lasterren jaurtiki urren
erdilo zegon trikua,
ipurtargi ta pinpilinpauxez
bete da nere burua.

Nere zartzaro
illunean gaur
piztu da zerbait;
iñar-jarioz
gezur bat ote...?
zer barrendu zait?

Zorigaitzaren larri samiña
sendatu zait..., ito nere

biotzean len ezkibel zegon
xomorro beltxa; gaur ume!
Irudi laztan jayoberriok
zer gai dira..., nungo sortze...?
Txingar ariñen gurutz'egada
nere pozaren poz-eule!

Ixillun baten
ordez nik orain...
zerbat argizko irudi...!;
mama gozo au
beste pittin bat
Malen, ixuri!



BELARRA

Arazo-garaiz
erre-zale naiz,
pipa da nere laguna,
ke-belar oso
samin ta gozo
nastuen ontzi kutuna.

Pipa laburra;
nere sudurra
usai-eginkor luzea;
onen azpiyan
dagon aldiyan
nik pozor bete-betea.

Nayen dan eraz
maita det beraz
atson darion belarra;
onen bidez ain
barru det orain
idarokizko txingarra.

Toxatik artu,
gañezka sartu
kider-buru xakonean;
ke-belar ori
urriñez jori
laister da sudurmintzean...

Pipa txuriya,
kirten ausiya,
zorungai eder osoa;
aur zar batentzat,
ziñez neretzat,
edoski maite gozoa.

Ezpain-ertzean
pipa jartzean...
agur!, kezkaren goibela:
burauste zakar
guzik, bai azkar
banatu kea bezela!

Uste bat oker
irten-da loger
etsayaz etsai banago,
pipari esker
ez du gau-lisker
onek irauten luzaro.

Olerkarien
amets-aldien
goraltzigarri da nimbait;
argatik nere
olerki-xeme
apal au berdin sortu zait.

Arazo garaiz
ele-zale naiz,
pipa da nere laguna:
ke belar oso
samin ta gozo
nastuen ontzi kutuna.



ERREGE-JAYA

Izar txuri-txuri bat
agertu da goyen;
au poxal laister dira
Erregiak emen.
Pitxi eder ta goxo
ekartzale oien
bidera guk, amatxo,
zurekin lenbaile...

Goazen, goazen txit alai
Izazkun-mendira,
argitasun polita
piztu dan tokira!

Aurtxo maitagarriak
maitatzera pozik
zaldi-gañean datozi
eguzki aldetik.
Ara..., ara nun diran
jostalluz beterik;
errege beltxa dator
bestien aurretik!

Apaiñ-apaiñ jantzita
lore-sorta bana
eskeintzera gatoz gaur
erregiengana.

Ama-Birjifiari ere,
atsegina ar dezana,
txortakin batez muxu
nai diogu eman;
t'iru errege oeri
amatxo, zuk, esan
pitxiak, bai, jartzeko
aren eskuetan.

... Orain aurrean daude;
ikusi bertatik;
iñioiz ez degu izan
orlako zorunik.

Au poxal!... Erregiak
etorri zaizkigu,
biotz-biotzez orain
agurtzen ditugu.
Laister, lo bat eginda,
zorioneko gu!
xapata barrenean
a, zenbat jostallul

Amets eder goxo bat
aurrak ein dezaten
izar txuri politak
piztu dire goyen.



ELUR-OSTOAK

Egun epel ugari
aurten azaroak
eman dizkigu, bañan
zer ondorengoak!
Aizeak daramatzzi
zuaitzen ostoak
ta ixill-ixillik daude
txoríño gaxoak.

Uso-luma txurien
antzez mara-mara
elur-ostoak dator
mendi gañetara.
Txuri... txuri-soill ango
larre, baso, txara...,
laister bean ere bai
elurrezko izara.

Itxaso ta mendiyak
era batez ubel,
argizpitxo bat ere
iñondik ez emen.
Illotzik dago lurra,
oztaldea goibel,
nere gogoa berriz
erdi-gaxo..., motel...!

Ez, ez...; agertuko da
noizbait eguzkiya,
illun otzaren urren
berogai argiya.
Orain negua, bañan
gero udaberriya,
poztu bedi-ba nere
barrengoa txoriya!

ABESTI KUPIGARRIYA

Goiboloz-unez aurten izan dan
illunperik otzenean,
auzoko beste guziak lasai
lotan zeuden bitartean,
eresi xamur negarrarri au
entzun det bart arratsean.

«Gaitzaren mende
ain kupigarri
zauden semetxo maitea,
gau otza da-ta
mugitu gabe
seaskan egon zaitea».

«Negarrik ez-ba...,
ene biyotxa,
pupua nun, zer min dezu?;
maite-maiteka
zure amatxok
azkar sendatuko zaitu».

«Listor beltzen-bat
oso barrura
sartu zaio Maitiño'ri;
gaxoak orain
zurbildutako
landaretxoa dirudi».

«Ikaraz nago:
elur-maindire
gañez datorren aizeak
aldizka emen
banatzen ditu
txakur-zaunkada luzeak».



«Otoi, otoi, Jaun!...
Ume laztan au
luzaro ez euki miñez,
bestela nere
biotz gaxoa
lertuko da zorigaitzez....».

«Orain,, bai argi!...!
Zure begitan
piztu da zero ber-bera;
Maitiño polit
zoragarriya
laister sendatuko zera».

«Abo xabalik
lotan... Ez, ene!...
illotz, illotzik Maitiño!;
il da-ta nere
bizitz argal au
goibeldu beti-betiko!».

Ixildu zan...; ezeren txintik
ez nuan geigo nabaitu;
illunde otza goi eta bean
guziya len bezin mutu...
Gertaldi beltz au iñolaz ere
ezin det burutik kendu!

OROIMEN ZARRAK

Santo Tomas'ko periya...

Umetan nik ain gogoz izanik
erri polit au ikusi naya,
etzait beñere aztuko noski
oñez etorri nitzan garaya.
Berrogei urte gaur bete dira,
egun berau zan..., egun alaya!,
neretzat jairik bein izan bada,
aitortu bear, ura zan jaya!
Itxaso zabal, Zurriol aundi,
Alderdi-eder, bulebar, kaya...
Tolosatikan zetorren mutil
koxkor batentzat izer ikuskaya...!
Ondoren berriz plaza berriyan
arkitu nuan beste pozkaya:
ango zalapart, algara zoro,
jardun bizi ta... txistor-usaya!;
esan zeikean jai ori zala
Akelarre'ko sorgin-eztaya.



DONOSTI'KO ERRI—JAYA

Oitura zar gozoak
berrizturik emen
zernai jolas badute
koxkeruak aurten.

Ikusi gabe oso
zalla da sinisten
erri-jai onek zenbat
zorion dakarren.

Gizasemeak alai,
neskatillak zoro,
oien biotzak iñoz
ez daude noski lo.
Gazteak bakarrik ez;
baita zarren gogo
motela-re gaur *pil-pil*
gazte xamar dago.

Maitagarri'ren aizpa
polit, atsegiañak,
musu-gorri, begi-beltx,
edo bai urdiñañak,
itz batean: emengo
anderux panpiñañak,
zuek izain zerate
gaurko erregiañak.

Biotz guziak ernai,
begiyak dizdikor,
jolasen otsa nunai
zabaldu da bizkor.
Beñere poz bat izan
ez duanik iñor
baldin bada... jai ontan
Donostira betor!

ELURMENDI

Zer irudi gaur...? zer alatzaro
gelgarri mendi-gañean...?
Aitor ber-bera endikur baten
antzez an oztadarpean!

Aitor'ekin bat ara nun berriz,
ara nun euskozai garbi
ta goyeneko idazlaria!
Berori zein?... Elurmendi.

Negarrez dagon Amaren alde
Elurmendi'ren ekifña...!;
negarrik ez gaur beste guziok
ain zintzo jardun bagiña.

Lore samiñañak usai gozoa,
basillunak intz-iñargi,
satorrik ez dan Elurmendi'ko
erle beltxak ezti txuri.

Jaun argi ori ez da beñere
izan, ez, gogo-sorayo;
itz-eule jator bikañagorik
emen beintzat ez da jayo.

Ziri-jolas on politak ere
ba'dakizki sortzen alai;
arrano beltxa! joku zaill ortan
iñor ez noski bere gai.

Txiliport edo pottorro bezin
murgile bizkor, yayua,
ziriya sartu ondoren zuk *pott!*...
arrapazak pottorrual!



Urgull-mendiko zugaztitxoan
elkartu biltzen geranak
biotz-mamitik demaizkitzugu
atseginezko laztanak.

ARRANO TXIMIST

Garitaonandia'tar Bitor jauna'ri

Buru ta biotz
osoro berdin
aberzai baten antzera
«Argi» darion
zuzen-bidetik
galenki zoaz aurrera.

Oñak arin ta
biotza sendo,
neke bildurrik ez dezu;
goiko basotik
lau aldetara
irrintzi t'abar dagizu.

Ain abesle dan
Elurmendi'ko
urretxindor maite ori
bertan ikusten
zaitun aldiro
asten da pozez kantari.

Gogoz ernaya,
ankaz txit agitz,
oreña bezin bizkorra,
maldarik zalen
pikoenetik
zu beti gora ta gora!

Arrano tximist!...,
ez derizkiot
zuretzat gai danik iñor;
geyenak poto
egin degu-ta...
zu zera nagusi, Bitor!



ABIÑE TA XUMELAR

Abesgai

XUMELAR

Ene kutuntxo maitia,
Aitormendi'ko lilia,
olerkari ta biotz gaxoen
amets-irudia;
urdin gorengo txingia,
izartxo dizdizaria,
otoi dagizut! Abiñe,
nitzaz kupitu zaitia!

ABIÑE

Itz eder oien eztia
legun eta bereziya,
zure goi-jardun aratzak, ene!...
zoratu nau iya;
sinistutzen det egiya
izango dala guziya,
begi zoliak, ezin ukatu,
biotz maitatiya.

XUMELAR

Zuk ere begiak zoli,
uso batek bezin argi,
ain zeru-txingar politik
ez det egundaño ikusi;
ezpañak anpolai gorri,
ortzak berdin, txuri-txuri,
elur gañeko pinpiña
zure aboak dirudi.

ABIÑE

Ez det izan ispillurik
ugeldi garbiya baizik,

itxusi edo ederra naizen
ez dakit oraindik;
bañan esango dizut nik
ez dala beste biotzik
nereak ainbat Xumelar'ena
maita lezakenik.

XUMELAR

Goibel ondorean urdin,
zorilatz urren atsegin,
bat-batez orain arindu zaizkit
ainbeste kezka-min;
zure gogozko izan nedin
egingo det nik alegin,
izeñen zorion bizi bagiña
biyok alkarrekin!

ABIÑE

Xumelar mutill alaya,
Mendiburu'ko artzaya,
garbiro, ziñez itzegiteko
eldu da garaya;
berdin danez gure naya
zu, bai, nere senargaya,
laister biyontzat bat izan bedi
otorduko maya.

XUMELAR

Lilitxu panpin laztana,
nere maitekor zerana,
mintzo gozoen eztia dator
zerutik nigana;
zer ote gerta zaidana...?
o, nere zorun otxanal!,
etzait aztuko pozaren-pozaz
gaur entzun detana.



ELKARMAITEAK

Mendi-mendian biziro jator
atsegiañaren susnoa
arturik daude Indo ta bere
emaztegai dan usoa.
Berau liraña, mutilla berriz
aritza bezin sendoa,
antzu ta txepel ez dago noski
mendarit oien gogoa;
ikusi biyak elkarri ziñez
damaien eztzi beroa!

Muin sakon batez irentsi nayaz
bezela bizitz osoa
dager Indo ta bere besotan
lilluraz txingi gozoa.
Ubiljario zoragarriya...
euskal-usai dun margoa!;
onen egille gaztea goruntz
«toki!» dearaka dijoa.
... Kaperotxipi, txalo ba zuri,
txalo ta goren-zantzoa!

GURE TXOKOA

Abesgai

«Gure txokoa» da gure txoko
berezi maitagarriya,
atsegiañaren kabiya,
goibek ez dan tokiya,
«Gure txoko»an betiro dager
pozaren poz-eguzkiya.

*Gogo-lizunik beñere sortu
etxalon toki laztana...
«Gure txokoa», gure txokoa,
biotz-ibargi zabala!*

Alaitasunik ederrenean,
zorioneko gizartez,
lagundi onen bitartez
elkar maita degu ziñez:
alditxar edo sumin gaiztorik
«Gure txoko»an beintzat ez.

Gogo-lizunik...

«Gure txokoa»n izaten degu
atsegiañezko billera;
arazo txarrik... bai zera!,
samiñak aide batera
utzirik emen ezin obeto
guziok arkitzen gera.

Gogo-lizunik...

Eresti jator politak emen,
ziri-bertso ta beste gai
xamurragoak ere bai
abesten ditugu noiznai;
billera-txoko pozgarri ontan
gure biotzak beti jai!

Gogo-lizunik...



Oraindiokan iñori etzaio
emengo aterik itxi;
naiz izan beltz edo txuri,
ezpada beintzat mutiri,
gogo zuzenez baldin badator
«Gure txoko»ra sar bedi.

Gogo-lizunik...

«Gure txoko» da gure txoko
berezi maitagarriya,
atseginezko kabiya,
goibelik ez dan tokiya,
«Gure txoko»n betiro dager
pozaren poz-eguzkiya.

LEIZA

Lenen-garaiko
lurrin gozoa
darion erri xar ori
alai ta txukun
mendi-niendian
begira zeñen egokil...
Basetxe polit,
saroi aberats,
landa-saill eder ugari,
gorenen berriz
erpin galenak
erritxoaren zaindari.

Bazter maitia,
txoko laztana!,
zure gogo ber beraz ni
euskotar naizen
ezker pozez
agur dagizut..., irrintzi!



AKELARE

Sorgin-eztayak

Iñauteri egunez
Tolosarren pozkai
zorionean gatoz
abesturik alai.
Ez gera gu zenbaitek
uste bezin etsai,
kalterik ez diogu
iñori egin nai.
Zuek dezuten jayaz
sorgiñak ere jai.

—Andre muskin sudur kako,
begi-gorri;
onen aurrean mamutzar
ezpain-lodi.

Gauz arrigarri asko
egiten ditugu:
itxusi diran gazte
guziak edertu,
ta neskazarra noiznai
berriro gaztetu.
Geroko berri ere
ziñez ba'dakigu,
etorkizunik ez da
guretzat illundu.

—Andre muskin...

—Basojaun bizarbeltzak
andre muskiñari
eragiten dizkio
milla sorginkeri.
Biyak ziñuka daude
bata besteari,

ta pertzaren barrenak
borboill-otsa dagi.
Eztayak dira laister,...
zoramena sarri!

—Andre muskin...

BASOJAUN

Zure gogoa oso
lizundu ezpada,
andre muskin, atoz gaur
nere besotara;
sorgin-ontziak emen
borbollez dasana
iduri zait erantzun
atsegina dala.
Muskin, argitu bedi
lezaundiko itzala!

MUSKIN

Nere biotz-barrengo
irakin gozoa
Basojaun, zuregana
lurrantsu dijoa;
ontzi onek darion
marmari zoroa
ezin izan liteke
adikorragoa...
Gaurtandik nere senar
basojaun sendoa!

—Kuku sorgiñak iru bider jo...
entzun degu bere deya
gaur arratseko illargipean
Akelarren eztai-jaya.
Basamilloa surtara bota,
orain degu-ta garaya;
maitaro emen zabaldu bedi
sorgin-belarren usaya!



—Tin... tin... tin...
—Ju, ju, ju, ju!
Ja, ja, ja, ja!

—Entzun, entzun jai-algara
zaleki osiñik-osiñ,
lur osoak poz-ikara,
izate guzia sorgiñ.
Gaur degun asti-billera
arrats obegoan ezin;
uju, ju, ju!,
ja, ia, ia, ja!...
Andre muskin, andre muskin
askai zoroen erregiñ!

LOZORROA

Irudi polit egalarria,
mari-sorgiñen aizpa txuriya,
jarraitz aríñez dardar bizian
egiñalean
itzuri doa pizturik bere
leñuruz goiko sapai guziya.

... Orain, zer emen...? Itzal gaitza,
arrats egoen irabiyoa.
Gau naspill ontan biziго larri,
buru-belarri,
iñolaz ezin... ezin arindu
nere jabe dan amets-mordoa.

Dunbots-ikara, tximist-argiya,
etsai-zalapart izugarriya,
ta gainka berriz itxaso nastu,
indar askatu
amorratuen eraso beltza,
apar darion ekiñaldiya.

... Otoi, Basojaun; ez egin arrunk!,
ire mendean zertako nadunk?
zer asmo gaitzok neregan'akar?
Ogei atzapar,
ara or... ara ...!; ez ba nigana...!
Bosojaun, Bosojaun... «zurr... unk, zurr... unk».

* * *

Goiznabar-zori, goiznabar-zoril,
leiza-zuloa erraldoi-obi!
Mendi-tontorra len bezin alai;
garaitots, garai!
Egun argitzez andik amildu
osin-basoko mumutzar ori!



PELLO-ZIRI

Oñetako egille
yayua zan ori,
bañan jai egiteko
yayogua noski:
alper izugarriya,
lanetik igasi
sagardotegietan
zebillena beti.
Bere nagusi onak,
uzkurti arekin
jardun gaitoan geigo
ibilli etzedin,
bein esan zion: Pello,
aspaldi zeregin
edo lan gutxi dago
t'aurrera nik ezin
artu zindezket emen...
«Zer? —Pelo'k daruntz— ni,
lanik ez dagolako
emendik bidali?
Ez orixel; barkatu,
bañan erabaki
txarra eman diozu
gaurko auziyari;
iru geranoktakik
bidal itzazu bi;
lanik ez dan tokiyan
alperra nagusia».
T'alkiyarekin, *tanka*,
lurra joaz bertan,
lantegiko nausiyak
bidali etzezan,
gure Pello-ziri au
gogor exeri zan.
Arrazoirk etzula
iñork ezin esan!